

Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat pillugu Namminersorlutik Oqartussat nalunaarutaat

Matumuuna nalunaarutigineqarpoq Tapersiissutitalimmik inissialiortiternermut taarsigassarsititsisarneq pillugit Inatsisartut inatsisaat nr. 40, 28. novembari 2019-imeersoq, allannguutit ukunani pineqartut ilanngullugit Inatsisartut inatsisaat nr. 59, 25 novembari 2024-meersoq.

Kapitali 1

Atuuffia

§ 1. Inatsisartut inatsisaat manna Kalaallit Nunaanni inissialiortiternermut tapersiissuteqartarneq pillugu Inatsisartut peqqussutaat nr. 10, 22. december 1986-imeersoq, inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 1, 9. april 1992-imeersoq, inissialiornermut tapersiissuteqartarneq pillugu Inatsisartut peqqussutaat nr. 11, 19. november 2007-imeersoq atuuttuusimasut naapertorlugit Namminersorlutik Oqartussanut taarsigassarsianut ingerlasunut atorpeqassaaq.

§ 2. Inatsisartut inatsisaanni matumani aalajangersakkat naapertorlugit Naalakkersuisut:

- 1) akiitsullit nikinnissaannut akuersissuteqarsinnaapput,
- 2) allannguisinnaapput nuussisinnaallutillu, kiisalu
- 3) taarsigassarsianik ingerlasunik isumakkeerinninnissamut akuersissuteqarsinnaapput.

§ 3. Inatsisartut inatsisaanni matumani aalajangersakkat naapertorlugit Naalakkersuisut taarsigassarsianut ingerlasunut akilersuutinit aamma taarsigassarsianik ingerlasunik allannguilluni taarsigassarsinermut tapiissuteqarsinnaapput.

Aalajangersakkat tamanut atuuttut

§ 4. Inissiaq ingerlasunik taarsigassarsiaqarfusoq sukkulluunniit ikuallattoornissamut ajoqusernissamullu sillimmaserneqarsimassaaq.

§ 5. Akiitsullit nikinnissaanut, allannguinnissamut, nuussinissamut isumakkeerinissamullu allakkatigut qinnuteqaat Naalakkersuisuni suliarineqartussanngorlugu nassiunneqassaaq.

Imm. 2. Taarsigassarsiallip Naalakkersuisunit tapiissutitut tiguneqartut tunngavissaqanngitsut, qinnuteqaatip suliarineqarneranut imaluunniit kingusinnerusukkut pissutsit allanngornerinut atatillugu eqqunngitsumik amigartumilluunniit paasissutissiinerup kingunerisaanik taarsigassarsiallip pissarsiarisimasani utertillugit akilissavai.

§ 6. § 5 naapertorlugu qinnuteqaatinik suliaqarnissamut Naalakkersuisut uku pillugit maleruagassanik aalajangersaasinnaapput:

- 1) qinnuteqartarnerup ingerlasarnera,
- 2) paasissutissanik ilassutissanik pissarsiniartarnej,
- 3) qinnuteqarnissamut immersugassanik assigiissaakkanik suliaqarneq atuinerlu, kiisalu
- 4) pissutsit, qinnuteqartumut tunngatillugu immikkut ittumik pingaaruteqartinneqartut.

Imm. 2. Naalakkersuisut allamut, akiitsullit nikinnissaannut, allannguinnissamut, nuussinissamut isumakkeerinnissamullu qinnuteqaatinik aqutsinermut atatillugu sullissinernik suliallu piareersarnerinik isumaginnittussamut isumaqatigiissuteqarsinnaapput.

§ 7. Naalakkersuisut inissiamik, Inatsisartut inatsisaanni matumani ilaasunik taarsigassarsiaqarfiusumik tigusaqarpata, Naalakkersuisut inissiat teknikkikkut aningaasaqarnikkullu naliliiffigineqarnissaannut Naalakkersuisut aalajangersaasinnaapput.

Kapitali 2

Piginnittut nikinnerat

§ 8. Naalakkersuisut allanik aalajangigaqanngippata, piginnittut nikinneranni taarsigassarsiat ingerlasut akiligassanngortinneqassapput, taamaattorli tak. imm. 2.

Imm. 2. Taarsigassarsiat ingerlasut piginnittut nikinneranni akiligassanngortinneqassanngillat:

- 1) taarsigassarsisumiit aappaasumut, aappaasutut nalunaarsorsimasumut inooqataasumulluunniit, imaluunniit
- 2) taarsigassarsiallip toqunerani taarsigassarsiallip kingornussisussaanut.

Imm. 3. Inuk piginnittut nikinnissaat sioqqullugu sivikinnerpaamik ukiuni marlunni taarsigassarsiallip inoqutaanut ilaasimasoq inuillu nalunaarsorsimaffianni nalunaarsorsimasimasoq inooqataasutut isigineqassaaq.

Imm. 4. Taarsigassarsiallip toqunerani taarsigassarsiallip aappaa, taarsigassarsisumut aappaasutut nalunaarsorsimasoq kingornussisussaaluunniit taarsigassarsinissamut piumasaqaatit piffissarlu akilersuiffissaq allanngortinnagit taarsigassarsianut ingerlasunut akiitsulittut inississaaq.

§ 9. Inissiamik pisisup taarsigassarsinissamut piumasaqaatit piffissarlu akilersuiffissaq allanngortinnagit taarsigassarsianut ingerlasunut akiitsulittut inissinnissaanut Naalakkersuisut akuersissuteqarsinnaapput.

Imm. 2. Inissiamik pisisup inoqutigiinni ukiumut isertitaanik akileraarutaasussanik, pigisaanut nalilinnut aammalu siunissami Namminersorlutik Oqartussanut inissiamut taarsigassarsianut ingerlasunut ernianut akilersuutinullu akiliisinnaassuseqarneranik, aammalu inissiamik isumannaatsumik aserfallatsaaliuisinnaanerani ataatsimut naliliineq tunngavigalugu Naalakkersuisut akuersissuteqassapput.

Imm. 3. Piginnittut nikinnerannut atatillugu piginnittut nikinneranni akilersuutit akilersorneqartarnerinut, kiisalu piffissamut akilersuiffiusussamut allannguisoqarnissaanut piumasaqaatinik Naalakkersuisut aalajangersaasinnaapput.

§ 10. §§ 8 aamma 9 naapertorlugu akiitsullit nikinneranni inuit inersimasutut oqarsinnaatitaasut aamma Kalaallit Nunaanni inuit nalunaarsorsimaffianni nalunaarsorneqarsimasut kisimik akuerineqarsinnaapput.

Kapitali 3

Taarsigassarsianik ingerlasunik allannguisarneq

§ 11. Taarsigassarsianik ingerlasunik, aammattaaq akilersuutitut tapiissuteqarfusaartunik allannguinnermi Naalakkersuisut akilersuinnermut tapiissutitalinnik taarsigassarsititsisinnaapput.

Imm. 2. Allannguinnermut taarsigassarsiat amerlassusaannik aalajangersaanermut akiitsut sinneri, akiligassat akiligassanngortinneqartut, akiitsut akilinngitsuukkat, sillimmasiinnermut akiliussigallarneq taarsigassarsianullu ingerlasunut akiligassat ilaatinneqassapput, tak. imm. 1.

Imm. 3. Naalakkersuisut allannguinnissamut taarsigassarsititsippata, taarsigassarsisunut ataasiakkaanut akilersuinissamut pilersaarusiortoqassaaq, tassanilu akiliutissat piffissarlu taarsigassarsiat allanngortinneqartut akilersorneqarfissaat allassimassaaq.

§ 12. Naalakkersuisut allannguinnermut taarsigassarsititsisinnaapput:

- 1) inunnut, ukiuni akileraarfusuni kingullerni marlunni inoqutigiinni ukiumut 180.000 koruuninik amerlanerusunilluunniit isertitaqarsimasunut, imaluunniit
- 2) inunnut, piffissami qanittumi maannamut isertitarisarsimasaat apeqqutaatinnagit inoqutigiinni ukiumut 180.000 koruuninik amerlanerusunilluunniit isertitaqalernissamut naatsorsuutigineqartunut.

Imm. 2. Meeqqanut angerlarsimaffimmi najugaqartunut, 18-it inorlugit ukioqartunut, najukkami inuit nalunaarsorsimaffianni nalunaarsorsimasunut, taamaattorli amerlanerpaamik meeqqanut arfinilinnut imm. 1-imi nr. 1 aamma 2-mi isertitassanut killigititat meeqqamut ataatsimut 4.000 koruuninik qaffanneqartassapput.

§ 13. Allannguinnissamut taarsigassarsinissamik qinnuteqaatinik suliaqarnermi Naalakkersuisup immikkut eqqarsaatigissavai, qinnuteqartup:

- 1) pigisai nalillit,
- 2) akiitsuisa sinneri,
- 3) maannamut akiliisinaanissamut piginnaaneqarnera piumassuseqarneralu,
- 4) inuussutissarsiorsinnaanera naatsorsuutigineqartoq, aamma
- 5) taarsigassarsianik akilersuisinaanissaata ilimanaateqarnera.

Imm. 2. Aamma inissiap pisoqaassusia, niuerutigineqarnermi nalinga inissiallu tunineqarsinnaaneranut periarfissat Naalakkersuisunit pingartinneqassapput.

§ 14. Allannguinnermut taarsigassarsiat inissiap qularnaveeqqusiunneqarneratigut qulakkeerneqassapput.

Imm. 2. Inissiamik qularnaveeqqusiissuteqarnermi salliutitsinikkut allannguinnermut taarsigassarsititsisoqassaaq. Kisiannili allannguinnermut taarsigassarsiani inissiaq qularnaveeqqusiullugu atugassarititaasut tulleriiaarinerillu allannngortinnagit taarsigassarsiarititat ataqqineqassapput.

Kapitali 4

Taarsigassarsiallip akiliutai, tapiissutit aamma meeqqanut tapiissutit

§ 15. Naalakkersuisut taarsigassarsianut ernialinnut ingerlasunut aamma akiliutinut tapiissuteqartarnermut piumasaqaatit atorlugit allannguinnissamut taarsigassarsianut akiliutinut tapiissuteqarsinnaapput.

§ 16. Taarsigassarsiat akiliutinut tapiissutitallit taarsigassarsianut piumasaqaatit atuuttut allannngortinneqaratik erniaqartinneqassapput akilersorneqassallutillu.

Imm. 2. Allannguinnermut taarsigassarsiat ukiumut 6 procentinik erniaqartinneqassapput. Qaammammut akiligassat aalajangersarneqarnerini taarsigassarsianut ingerlasunut allannguinnermullu taarsigassarsianut utertitsilluni akilersuineq tamarmiisoq sivisunerpaamik ukiunik 25-inut sivisussuseqartinneqassaaq.

Imm. 3. Taarsigassarsialik sukkulluunniit immikkut ittumik akilersuisinnaavoq, taamaalillunilu piffissaq utertitsilluni akilersuiffusussaq sivikillineqarsinnaalluni. Immikkut ittumik akilersukkat § 17 naapertorlugu Naalakkersuisunit tapiiffigineqarnissamik pisinnaatitaaffigineqarput. Taarsigassarsisorli immikkut ittumik akilersuissappat, akilersuinnermi meeqqanut tapiiffigineqarnissamut pisinnaatitaaffeqartoqassanngilaq, tak. § 17, imm. 2.

§ 17. Taarsigassarsialik akiliutit 70 procentiinik akiliisassaaq, Naalakkersuisullu akiliutit 30 procentiinut tapiissuteqartassallutik, tak. § 15 aamma § 16.

Imm. 2. Taarsigassarsialik qaammammut akiliutissat akiligassanngorfini 18-it inorlugit ukiulinnik angerlarsimaffimmi najugaqartunik, inuit nalunaarsorsimaffianni nalunaarsorsimasunik meeraqarpat, taarsigassarsiallip tassunga akiligassai ikilisinneqassapput, tak. imm. 1. Meeqqamut ataatsimut, taamaattorli amerlanerpaamik meeqqanut arfinilinnut, taarsigassarsiallip qaammammut akiligassai 7,5 procentinik ikilisinneqassapput.

Imm. 3. Meeraq akiligassanut ilanngaataasoq angerlarsimaffimmi najugaqarunnaarpat, imaluunniit inuit nalunaarsorsimaffianni angerlarsimaffimmi najugaqartutut nalunaarsorsimajunnaarpat taarsigassarsialik pisussaavoq tamanna pillugu allakkatigut Naalakkersuisunut nalunaaruteqassalluni.

§ 18. Taarsigassarsiallip qaammammoortumik akiligassani piffissaq eqqorlugu akilinngippagu, Naalakkersuisut tunngavissaqanngitsumik uninngatitsinatik akiligassap akilerneqarnissaanut allakkatigut piumasaqaateqassapput. Piumasaqaatini tamani akiitsunut akilinngitsuumkanut piumasaqaateqarnermut akiliut 50 koruuniusoq, 1.000 koruunit sinnerlugit akiitsorisanut 2 procentinik ilallugu ilaliunneqassaaq.

Kapitali 5

Taarsigassarsianik nuussisarneq isumakkeerinnittarnerlu

§ 19. Naalakkersuisut taarsigassarsianut ukiuni tallimani erniaqanngitsunut akilersugassaanngitsunullu akiligassanngortitanik, akiitsunik akilinngitsuukkanik, piumasaqaateqarnermut akiliutininik akiitsullu sinnerinik allannguisinnaapput. Allanguinermi taarsigassarsiallip ukiuni akileraarfusuni kingullerni marlunni inoqutigiinni ukiumut 180.000 koruuninik inorlugilluunniit isertitaqarsimanissaa, imaluunniit piffissami qanittumi maannamut isertitarisarsimasaat apeqqutaatinnagit inoqutigiinni ukiumut 180.000 koruuninik inorlugilluunniit isertitaqartussanngornissaa piumasarineqarpoq.

Imm. 2. Naalakkersuisut piffissaq erniaqartitsiviunngitsorlu ukiut tallimakkaarlugit sivitsortarsinnaavaat. Taarsigassarsiallip imm. 1 naapertorlugu nussinissamut piumasaqaatit suli naammassisimanngippagit, taarsigassarsiat akiligassanngortinneqassapput. Naalakkersuisut taarsigassarsianik allannguissamut akilersuutitut tapiiffigineqartunut taarsigassarsititsisinnaapput. Taamatuttaaq allannguissamut taarsigassarsititsisarnermut aalajangersakkat atuutissapput.

Imm. 3. Meeqqanut angerlarsimaffimmi najugaqartunut, 18-it inorlugit ukioqartunut, najukkami inuit nalunaarsorsimaffianni nalunaarsorsimasunut, taamaattorli amerlanerpaamik meeqqanut arfinilinnut, isertitassanut killigitat, tak. imm. 1, meeqqamut ataatsimut 4.000 koruuninik qaffanneqartassapput..

Imm. 4. Eqqartuussinikkut taarsigassarsiallip tammaaneqartup toqusimasutut isigineqarnerani, piginnittut nikinneranni kiisalu inissiamik isaterinermi taarsigassarsialik akiliisinnaajunnaarsimappat, akiliisarnermik unitsitsisimappat, isumaqatigiissutit uniorlugit iliuuseqarsimappat, akiliisinnaannginneq pequtigalugu atorunnaarsinneqarsimappat taarsigassarsiat erniaqanngitsut akilersugassaanngitsullu akiligassanngortinneqassapput. Piginnittut nikinnerat akiitsullit nikinnerannik qanorluunniit ittumik paasineqassaaq, tassungalu niueqatigiilluni aamma akeqanngitsumik tunniussinerit ilaatinneqarput, taamatullu piginneqataasumut, aappaasumut, aappaasutut nalunaarsorsimasumut, kingornussisussanut imaluunniit inooqataasumut tunniussinerit piginnittut nikinnerattut isigineqassapput.

§ 20. Taarsigassarsialinnut, ukiuni akileraarfusuni kingullerni marlunni inoqutigiinni ukiumut 180.000 koruunit inorlugit isertitaqarsimasunut, aammalu taarsigassarsianik nungutsisimasunut, taamaallaalli akilinngitsuukkanik akiitsulinnut Naalakkersuisut akiitsunik akilinngitsuukkanik peqqusinnermullu akiliutininik qaammatit 60-it ingerlanerini amerlaqatigiinnik aningaasartalinnik ikilisitsiartuaassapput.

§ 21. § 19, imm. 1 naapertorlugu taarsigassarsiat akiligassanngortinneqarpata, qinnuteqartoqarneratigut taarsigassarsiallip akiligassai, piginnittut nikinneranni isertitanit matussuserneqarsinnaanngitsut Naalakkersuisunit isumakkeerinniffigineqarsinnaapput.

Imm. 2. Qinnuteqaatip naliliiffigineqarnerani pingaartumik qinnuteqartup pigisai nalillit inuussutissarsiorsinnaanissaanullu naatsorsuutigisat, tunisinermi pissutsit, tassungalu ilanngullugu tunisinermi pitsaanerpaaq anguneqarsimanersoq eqqarsaatigineqassapput.

Imm. 3. Naalakkersuisut imm. 2 naapertorlugu qinnuteqaatinik suliaqarnissamut, sullissinissamut naliliinissamullu maleruagassanik aalajangersaasinnaapput, tassungalu isertitanut pigisanullu nalilinnut tungavissat suut, isumakkeerinniffigineqarnissamut anguneqarsimassanersut, kiisalu issutsit suut piginnittut nikinneranni naliliinermut ilaatinneqassanersut ilanngunneqassapput.

§ 22. Taarsigassarsisumut, inissiamut Naalakkersuisunut utertinneqarsimasumut imaluunniit Naalakkersuisunit utertillugu tiguneqarsimasumut akiitsoqartumut akiligassanngortitat, akiitsut

akilinngitsuukkat, peqqusinnermut akiliutit akiitsullu sinneri nalikilliaruaartinneqassapput.

§ 23. Taarsigassarsisunut aningaasaqarnikkut annertuumik ajornartorsiortunut, akiligassanngortitanik, akiitsunik akilinngitsuukkanik, peqqusinnermut akiliutinik akiitsullu sinnerinik isumakkeerinninnissamut allannguinnissamulluunnit piumasaqaatinik naammassinnissimangikkarluartunut Naalakkersuisut akiliisarnermik unitsitsigallarsinnaapput.

Imm. 2. Naalakkersuisut akiliisarnermik unitsitsigallarsinnaapput:

- 1) taarsigassarsiallip annertuumik aningaasaqarnikkut ajornartorsiornera qaangiuttussaappat, aammalu taarsigassarsiallip ukiup ataatsip iluani nalinginnaasumik akiliisarnini aallarteqqissinnaagaa naatsorsuutigineqarpat, imaluunniit
- 2) taarsigassarsiallip taarsigassarsianut akilersuinissaa ilimanaateqanngippat, aammalu taarsigassarsiallip ukiut marluk iluanni isumakkeerinninnissamut allannguinnissamullu piumasaqaatit naammassisimappagit.

Imm. 3. Naalakkersuisut qinnuteqaammik naliliinerminni akiitsut sinnerisa amerlassusii, qinnuteqartup maannamut akiliisinnaasimanera piumassuseqarneralu, qinnuteqartup pigisai nalillit aammalu inuussutissarsiorsinnaaneranut naatsorsuutigisat eqqarsaatigissavaat.

Imm. 4. Naalakkersuisut akilersuinnermik unitsitsigallarnissamut aalajangersakkanik sukumiinerusunik aalajangersaasinnaapput.

Kapitali 6

Pitsanngorsaanissamut taarsigassarsianik nuussisarneq

§ 24. Taarsigassarsiat akiliisarnermut tapiissutitalit ingerlasut, alliliinnermut pitsanngorsaanermulluunniit taarsigassarsiaritinneqartut qinnuteqartoqarnerani taarsigassarsianut erniaqanngitsunut akilersugassaanngitsunullu nuunneqarsinnaapput.

Imm. 2. Taarsigassarsianut ingerlasunut akiitsut 1. januar 2020-mi nuunneqassapput. Akiitsut naatsorsornerini aallaqqaammut taarsigassarsiaasunit akiligassanngortinneqanngitsut, akiligassat akiligassanngortinneqartut, akiitsut akilerneqanngitsut, sillimmasiinnermut akiliussigallarneq akiligassallu katinneqassapput.

§ 25. Taarsigassarsiat erniaqanngitsut akilersugassaanngitsullu piginnittut nikinneranni § 24 naapertorlugu akiligassanngortinneqassapput, tassanili pineqanngillat:

- 1) aappariit akornanni piginnittut nikinneri,
- 2) averusernermut avinnermulluunniit atatillugu piginnittut nikinneri, imaluunniit
- 3) Naalakkersuisut allamik aalajangigaqarpata.

Kapitali 7

Atuisinnaanermut killiliinerit aamma taarsigassarsianik akiligassanngortitsisarneq

§ 26. Taarsigassarsiat ingerlasut, allannguinnermut taarsigassarsiat imaluunniit taarsigassarsiat nuutat akilerneqarnissaasa tungaanut inissiamut tunngatillugu atuisinnaanermut killiliinerit uku atuutissapput:

- 1) Inissiaq sallunaveeqqusiullugu eqqartuussivilersuussisoqassanngilaq.
- 2) Taarsigassarsinnermi inissiaq qularnaveeqqusiunneqassanngilaq.

Imm. 2. Sillimmasiisarfik illumi ikuallattoornissamut sillimmasiiffusoq imm. 1-imi allassimasut apeqqutaatinagit sillimmasiisummut ernianut aningaasartuutinullu allanut sallunaveeqqusiiffigineqarnissamut pisinnaatitaaffeqarpoq. Kiisalu sillimmasiisarfik ullormit akiliiffissamiit ukiumi ataatsimi illumut sillimmaserneqartumut akiliutinut qularnaveeqqusiiffusunit allanit sallitinneqarluni qularnaveeqqusiiffigineqarnissamut pisinnaatitaaffeqarpoq.

§ 27. Taarsigassarsiat ingerlasut, allannguinnermut taarsigassarsiat imaluunniit nuussinnermut taarsigassarsiat akilernerneqarnissaasa tungaanut taarsigassarsialik inissiamik Namminersorlutik Oqartussanut, inissiap tigunissaanut pisussaaffeqartunut utertitsinissamik pisinnaatitaaffeqarpoq.

Imm. 2. Taarsigassarsiallip inissiaq Namminersorlutik Oqartussanut utertippagu, Namminersorlutik Oqartussat taarsigassarsisullu akornanni aningaasaqarnikkut iluarsisassat Naalakkersuisunit naatsorsorneqassapput.

Imm. 3. Aningaasaqarnikkut iluarsisassat inissiap piffissami Namminersorlutik Oqartussanut tunniunneqarfiani niueruteqarnermut nalinganut, Namminersorlutik Oqartussat akiligassanut akiligassanngortinneqartunut akiitsullu sinnerinut, kiisalu akiitsunut akilinngitsuugaasimasinnaasunut, sillimmasiinnermut akiliussigallarnerusinnaasunut akiligassaasinnaasunullu, kiisalu inissiap naliliiffigineqarneranut aningaasartuutinut piumasaqaataannik ilanngarlugit naatsorsorneqassapput. Taarsigassarsiallip iluanaarutissai tunniunneqassapput. Namminersorlutik Oqartussat iluanaarutissaat 0 koruuninut nalikillisinneqassapput.

Imm. 4. Inissiap niuerutigineqarnermini nalinga illunik tuniniaasartumit, Kalaallit Nunaanni suliffeqarfimmik, pigisanik aalaakkaasunik pisisarnermi tunisisarnermilu akunnermuliuttumik ingerlatsisumit, Namminersorlutik Oqartussanit toqqarneqartumit aalajangersarneqassaaq.

§ 28. Taarsigassarsiat ingerlasut, allannguinnermut taarsigassarsiat taarsigassarsiallu nuunneqartut akiligassanngortinneqassapput:

- 1) Taarsigassarsianut erniat akilersuutillu akilernerqarsinnaanngippata, aammalu taarsigassarsiallip akiligassat akilinngitsuukkat pigisamut aalaakkaasumut qularnaveeqqusiussaqluni taarsigassarsinnermi allagartaq, tak. Kalaallit Nunaanni qularnaveeqqusiisarnermut inatsit, malillugu ernianut akilersuinnermullu maleruagassat naapertorlugit piffissaliussap naannginnerani akiitsut akilinngitsuukkat akilersimanngippagit.
- 2) Taarsigassarsiallip inissiaq isumannaatsumik aserfallatsaalisimanngippagu, taamaalillunilu Naalakkersuisut qularnaveeqqusiiffigineqarnerat ajornerulersinneqartoq paasineqarpat.
- 3) Taarsigassarsiallip inissiaq ikuallattoornissamut ajoqusernissamullu sillimmasersimanngippagu.
- 4) Taarsigassarsiallip inissiaq isaterpagu.
- 5) Inissiaq taarsigassarsisumut imaluunniit attartortumut taassumalu inoqutigiivinit najugaqarfissatut aammalu aalajangersimasumik najugaqarfittut atornagu siunertanut allanut tamakkiisumik ilaannakortumilluunniit atorneqarpat. Taamaattoq inuussutissarsiutit mikinnerusut namminersortut taarsigassarsisumit imaluunniit attartortumit taassumalu inoqutigiivinit ingerlanneqartut mininneqarpat.
- 6) Taarsigassarsialik Naalakkersuisunit akuerineqaqqaarani inissiamit nuuppat inissiamilluunniit attartortitsippat.
- 7) Taarsigassarsialik inissiaq qularnaveeqqusiullugu taarsigassarsippat.
- 8) Taarsigassarsialik Naalakkersuisut inissiamik takuniaaneranni iseqqusinngippat.

9) Taarsigassarsiallip iluarsaassineq, alliliineq pitsanngorsaanerluunniit Naalakkersuisut taarsigassarsititsivigisaat naammassinngippagu.

§ 29. § 28 naapertorlugu taarsigassarsiat akiligassanngortinneqarnerini taarsigassarsiallip erngerluni taarsigassarsiat akilinngippagit Naalakkersuisut inissiaq tiguniarlugu aalajangersinnaapput.

Imm. 2. Naalakkersuisut inissiamik tigusineranni Namminersorlutik Oqartussat taarsigassarsisullu akornanni aningaasaqarnikkut iluarsisassat Naalakkersuisunit naatsorsorneqassapput.

Imm. 3. Aningaasaqarnikkut iluarsisassat inissiap piffissami Namminersorlutik Oqartussanut tunniunneqarfiani niueruteqarnermut nalinganut, Namminersorlutik Oqartussat akiligassanut akiligassanngortinneqartunut akiitsullu sinnerinut, kiisalu akiitsunut akilinngitsuugaasimasinnaasunut, sillimmasiinermut akiliussigallarnerusinnaasunut akiligassaasinnaasunullu, kiisalu inissiap naliliiffigineqarneranut aningaasartuutitut piumasaqaataannik ilanngarlugit naatsorsorneqassapput. Taarsigassarsiallip iluanaarutissai tunniunneqassapput. Namminersorlutik Oqartussat iluanaarutissaat 0 koruuninut nalikillisinneqassapput.

Imm. 4. Inissiap niuerutigineqarnermini nalinga illunik tuniniaasartumit, Kalaallit Nunaanni suliffeqarfimmik, pigisanik aalaakkaasunik pisisarnermi tunisisarnermilu akunnermuliuttumik ingerlatsisumit, Namminersorlutik Oqartussanit toqqarneqartumit aalajangersarneqassaaq.

§ 30. Naalakkersuisut inissiamik, Namminersorlutik Oqartussanut utertinneqartumik imaluunniit Namminersorlutik Oqartussanit utertillugu tiguneqartumik tunisinerminni, inissiap niuerutigineqarnermini nalinga, taamaattorli minnerpaamik inissiap teknikkimut aningaasaqarnermullu nalinga atorlugu tunineqarnissaa qulakkiissavaat, taamaattorli tak. imm. 2.

Imm. 2. Naalakkersuisut inissiaq utertitaq tigusarluunniit kommunimut ataatsimut tunniussinnaavaa. Pisinermi akiusoq Naalakkersuisut kommunillu akornanni isumaqatigiissutigineqassaaq. Tunniussinermi kingusinnerusukkut tuniseqqinnermi niuernermit nalinga, taamaattorli minnerpaamik teknikkimut aningaasaqarnermullu nalinga akigitinneqassasoq piumasaqaatigineqassaaq,

Kapitali 8

Sioqqutsilluni akiliisarneq

§ 31. Taarsigassarsiallip taarsigassarsiaanut ingerlasunut aamma allannguinermit taarsigassarsiaanut piffissaq sioqqullugu taarsigassarsisup taarsigassarsianik inaaraluni akiliinerani, akiliutinut tapiinissamut piumasaqaatit malillugit taarsigassarsiaritinneqartunut akiitsut 30 procentinik nalikillisinneqassapput. Tamatuma kingorna akiitsut nalikilliset piffissami taarsigassarsiallip akiliinissamut allakkatigut qinnuteqarfigisaaniit aamma taarsigassarsiat sinneruttut akilersorneqarnissaannut piffissamut 6 procentinik kingumut erniaqartitsisoqassaaq, taamaattorli taarsigassarsiat akilerneqarneriniit siusinnerpaamik ukiunut tallimanut.

Imm. 2. Akiitsut naatsorsornerini aallaqqaammut taarsigassarsiasunit akiligassanngortinneqanngitsut, akiligassat akiligassanngortinneqartut, akiitsut akilerneqanngitsut, sillimmasiinermit akiliussigallarneq akiligassallu katinneqassapput.

Imm. 3. Meeqqanut angerlarsimaffimmi najugaqartunut, 18-it inorlugit ukioqartunut, najukkami inuit nalunaarsorsimaffianni nalunaarsorsimasunut, taamaattorli amerlanerpaamik meeqqanut pingasunut,

akiitsut sinneri 1 procentinik nalikillisinneqassapput.

Kapitali 9

Taarsigassarsiat erniaqanngitsut akilersugassaanngitsullu piffissaq annikilliartuaarfissaat

§ 32. Taarsigassarsianut erniaqanngitsunut akilersugassaanngitsunullu, ukiuni 33-ni annikilliartuaartussatut piumasaqaateqarfutit tunniunneqartunut piffissaq annikillisitsiartuaarfissatut aalajangiunneqartoq, ukiunut 20-nut allanngortinneqartoq. Piffissap annikillisitsiartuaarfissap sinnera 20/33-mut iluarsillugu sivikillisinneqassaaq ukiumullu ilivitsumut qaninnerpaamut akunnaallisarneqassalluni.

Imm. 2. Tamatuma kingorna taarsigassarsiat erniaqanngitsut akilersugassaanngitsullu taarsigassarsianut piffissarititap sivikillisap ingerlanerani ukiut tamaasa amerlaqatigiinnik, siullermeertumillu piffissamut 1. januar 2020-miit 31. december 2020-mut, 31. december 2020-mi annikillisikkiartuaarneqassapput.

Kapitali 10

Atuutsitsilernerimut, atorunnaarsitsinerimut ikaarsaarnermullu aalajangersakkat

§ 33. Inatsisartut inatsisaat 40, 28. novembari 2019-imeersoq manna 1. januar 2020-mi atuutilerpoq.

Imm. 2. Tamatuma peqatigisaanik inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersoq atorunnaarsinneqartoq.

Imm. 3. Inatsisartut peqqussutaanni imm. 2-mi peqqussutit aalajangersarneqartut atuutsiinnarneqartulluunniit, imaluunniit Inatsisartut inatsisaat manna naapertorlugu maleruagassanik aalajangersaanikkut taarserneqarnissamik imaluunniit atorunnaarsinneqarnissamik tungaanut atuutiinnassapput. Uku atuutiinnassapput:

- 1) Akiliutissat akiligassanngortut taarsigassarsiallu amiakkuisa isumakkeerneqarnissaannik, taarsigassarsianik allannguinnissamut kiisalu allannguiniarluni taarsigassarsinissamut qinnuteqaatit aqunneqartarnerat pillugu Namminersornerullutik Oqartussat nalunaarutaat nr. 2, 26. januar 2006-meersoq.
- 2) Ukiup affakkaartumik akiliutaasartussat naatsorsorneqartarnerilu pillugit Namminersornerullutik Oqartussat nalunaarutaata allanngortinneqarneranik Namminersornerullutik Oqartussat nalunaarutaat nr. 47, 16. december 1994-imeersoq.
- 3) Ukiup affakkaartumik akiliutaasartussat naatsorsorneqartarnerilu pillugit Namminersornerullutik Oqartussat nalunaarutaat nr. 11, 22. marts 1994-imeersoq.
- 4) Inissialiornermut tapersiissuteqartarneq pillugu inatsisartut peqqussutaani kapitali 4 naapertorlugu taarsigassarsilluni illugineqartut attartortinneqartarnissaat pillugu Namminersornerullutik Oqartussat nalunaarutaat nr. 13, 22. marts 1994-imeersoq.
- 5) Inissialiornermut tapersiissuteqartarneq pillugu Inatsisartut peqqussutaat malillugu illorsuarnut tapersiiffigineqarsimasunut silliiranasiisarneq pillugu Namminersornerullutik Oqartussat Nalunaarutaat nr. 9, 22. marts 1994-imeersoq.

6) Init inuutissarsiornermut atorneqartut inigisamilu inuutissarsiummik ingerlatsineq pillugit Namminersornerullutik Oqartussat Nalunaarutaat nr. 7, 22. marts 1994-imeersoq.

§ 2

Inatsisartut inatsisaat nr. 59, 25. november 2024-imeersoq (Inissiamik atuisarnerup piumasaqaataanik erseqqissaaffiginera)^[1] 1. januar 2025-mi atuutilissaaq.

Imm. 2. Inatsisartut inatsisaanni taarsigassarsiat tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat imaluunniit tapersiissutitalimmik inissialiortiternermut taarsigassarsititsisarneq pillugit siusinnerusukkut inatsisaasimasut naapertorlugit tunniunneqartut ilaatinneqarput.

Imm. 3. Inatsisartut inatsisaani taarsigassarsinissanut neriorsuinerit ilaareersut tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat imaluunniit tapersiissutitalimmik inissialiortiternermut taarsigassarsititsisarneq pillugu siusinnerusukkut inatsisaasimasut naapertorlugit ulloq 1. januar 2025 sioqqullugu tunniunneqartut ilaatinneqarput.

Ineqarnermut Attaveqaasersuutinullu Naalakkersuisoqarfik, ulloq februar-ip 24.-at, 2025

Ruth Lindhardt (atsior.)

Pisortaaneq

/ Embla Kristjánsdóttir (atsior.)

^[1] Inatsisip allannguutaa § 28, stk. 5-mut tunngassuteqarpoq.

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut